

# Bese E Kgolo Ya Mmala Wa Botala Jwa Legodimo

-  Mecelin Kakoro
-  Mango Tree
-  Lorato Trok
-  Tswana
-  Level 2

(imageless edition)





Go ne go le bese e le nngwe fela mo motseng wa ga Ebei. E ne e le kgolo e le mmala wa botala jwa legodimo. E ne e le modumo thata.



Ka letsatsi lengwe mmagwe Ebei a re,  
“Kamoso re ya toropong go ya go reka  
diaparo tsa gago tsa sekolo.”



Ebei o ne a itumetse thata. Ba tlile go tsamaya ka bese e e kgolo ya mmala wa botala jwa legodimo. O ne a itumetse thata ebile a sa kgone go rabala bosigo joo.



Ebei o ne a setse a ipaakantse fa mmagwe a tla go mo tsosa.



Ebei le mmagwe ba ne ba ya kwa boemelong jwa dibese. Ba ne ba emetse bese e e kgolo ya mmala wa botala jwa legodimo. Mme bese ya se ka ya fitlha.



Batho ba bangwe ba ile ba fitlha kwa boemelong jwa dibese. Ba ile ba ngongorega ka ntlha ya fa bese e le thari. "Bese e kae?" ba botsa.



Ebei o ne a tshwenyegile. “Ga re na go kgona go ya toropong. Ga ke na go kgona go nna le diaparo tse dintšhwa tsa sekolo,” a nagana.





Batho ba bangwe ba ne ba itlhoboga mme ba boela gae. Ebei o ne a lela. O ne a sa batle go boela gae. Mmagwe o ne a mo kgothatsa. "Re tla emanyana gape," a rialo.



Morago ga nakwana, ba ne ba utlwa modumo. Ba ne ba bona lerole mo moyeng. E ne e le bese!



Mme fela bese e ne e se mmala wa botala jwa legodimo. E ne e se kgolo. Bese e ne e le khibidu ebile e le nnye. Batho ba ba neng ba emetse bese ba ne ba lebelela bese e. Ba ne ba se e palame.



“Palamang! Palamang!” mokgweetsi a goa.  
“Re thari thata gompiono,” a rialo.



Ebei le mmagwe e ne e le bone bantlha go palama bese. Morago ga nakwana batho ba bangwe le bona ba palama bese e khibidu e nnye.



Ebei o ile a lebelela ka letlhabaphefo. O ile a bona batho ba bantsi mo boemelong jwa bese.



Batho ba bantsi ba ne ba tabogela go tshwara bese. Mme ba ne ba le thari. Bese e ne e tletse. Bese e khibidu e ile ya ya toropong.



“Bese ya mmala wa botala jwa legodimo e kgolo e kae?” mmagwe Ebei a botsa. “E robegile,” mkgweetsi a araba. “Re a e baakanya. E tla filtha kamoso,” a tlatsa.





Ebei o ne a sa tshwenyege ka mmala wa bese.  
O ne a sa tshwenyege ka bogolo jwa bese. O  
ne a itumeletse fela gore bese e e ya  
toropong.



# Storybooks South Africa

[global-asp.github.io/storybooks-southafrica](https://global-asp.github.io/storybooks-southafrica)

## Bese E Kgolo Ya Mmala Wa Botala Jwa Legodimo

Written by: Mecelin Kakoro

Illustrated by: Mango Tree

Translated by: Lorato Trok

This story originates from the African Storybook ([africanstorybook.org](https://africanstorybook.org)) and is brought to you by [Storybooks South Africa](https://global-asp.github.io/storybooks-southafrica) in an effort to provide children's stories in South Africa's many languages.



This work is licensed under a Creative Commons  
[Attribution 4.0 International License](https://creativecommons.org/licenses/by/4.0/).